

# Vun driveriver

---

erscheint auf [www.lenauheim.de](http://www.lenauheim.de)

monatliche  
Erscheinung

September 2012

von Helen Alba

## E ganzi Familie im Einsatz

Es war mol wieder soweit. Es Fescht „Kinder des Dorfes“, des wu jedes zweitei Jahr in Lenauheim abghal werd, hat die heitiche un ehemaliche Dorfbewohner grad am Tach Maria Geburt 2012 zamtreffe gelosst. Zwar sin nimi sovill Gäscht wie sunscht aus Deitschland angereist, doch ware sich die meischte sicher: zwar klein, doch fein.

Die Veranstalter vum Fescht ware die Heimatortsgemeinschaft (HOG) un es Gemeindehaus Lenauheim. Schun zwaa Wuche vorher sin de Vetter Werner Griebel, HOG-Vorsitzender, un sei Bäsl Isolde in ihre Heimatort kumm un han gemeinsam mitm Schadater Richter, Ilie Suci, un em Vizerichter Constantin Triscau alles in die Weche geleit, dass es de Gäscht zwaa Täch lang an nix fehle soll. Eenfach is des nit, weil es git vill Rumlaaferei un Arweit. Un grad wann mer sei Beschtes macht, alli Leit kann mer nit zufriede stelle. Doch alles is gut abgeloff un die wu stalliert han, die selle ewe beim näkschte Mol derhem bleiwe.

Was ich noch betone meeht: Des Dorffescht is heier zum fünfte Mol (jedes zweitei Jahr) veranstalt gin. Un immer war die Familie Griebel aus Mannheim derbei, des heescht, dass sich aach ihre Kiner Zeit ghol han, herzukumme un mit zu feire: Es Astrid, dem sei Hobby wu es Fußballspille is, un de Jürgen Griebel, der de stellvertretender Bundesvorsitzender der Landsmannschaft der Banater Schwowe un ach Mitglied im Vorstand der HOG Lenauheim is. Mit derbei war ach der stellvertretendi HOG-Vorsitzende Helfried Klein un die Vorstandsmitglieder Niki Dornstauder un Hans Schütt.

## Schwowepuppe sollte ausgetauscht gin

De erschte Begegnungstach hat mit eem Treffe im Heimat- un Lenau-Museum anfang. De Hof war scheen hergericht, die Gäscht sin begriesst gin un es is die Red uf Lenauheim kumm, des Dorf schaut derezeit uf 245 Jahr Bestehe zruck. Un im August 2012 ware es 210 Jahr, seider Nikolaus Lenau in dem Haus, in dem wu jetz es Museum is, uf die Welt kumm is. Drum sin ach Lenau-Gedichter vorgetraa un Lieder noh Lenau-Gedichter gspillt gin. Mer hat noher es Museum un die katholisch Kerch, die wu gut instandghal is, besichtige kenne.

Die Red is ach uf die Trachtepuppe, die wu jo schon seider meh wie 30 Jahr im Museum ausgestellt sin, kumm. Werner Griebel un Ilie Suci bemiehe sich, e Leesung zu finne, dass mer die Puppephaare herrichte kann. De Richter hat sich mitm Banater Museum in Temeschwar in Verbindung gsetzt un de Vetter Werner hat alli Heimatortsgemeinschafte ufgeruft, entweder es Trachtephaar ihrer Ortschaft zu restauriere oder auszutausche. Merzendorf is derzeit die enzichi Ortschaft, die sowohl es aldi Puppephaar em Museum iwerloss, awer ach e neijes Phaar hergebrung hat.

Die Kulturreferentin for Südosteuropa am Donauschwäbischen Zentralmuseum, Dr. Swantje Volkmann, will sich insetze, dass die Reimlicheite im Museum renoviert un die Trachtepuppe restauriert gin.

## „Die Gsundheit kann mer nit aus Deitschland bringe“!

Dass die Gäscht doch ach was zu gsiehn un zu heere krien, is die Kinertanzgruppe aus Semiklosch kumm un hat schwowischi Tänz vorgfiehrt. Sie bsteht schon seit finf Jahr un is seit drei Jahr als „Buntes Sträußchen“ bekannt. Leiterinne der Grupep sin Helen Comlosan, Erzieherin un Religionslehrerin, un Ramona Roosz-Suba, Lehrerin. Unerstitzt werd die Tanzgruppe vun Dietlinde Huhn, Vorsitzendi vum Deitsche Forum aus Semiklosch.

Un dann hat de Raimund Slatina, der wu jo im Adam-Müller-Guttenbrunn-Altenheim Temeschwar lebt, zu singe anfang un hat derzu Akkordeon gspillt. Vorher hat die Bäsl Isolde Griebel gement, wann die Leit derbei quatsche, soll ich ans Mikrofon gehn un um Ruh bitte. Doch alli ware mucksmeischen still. Weil de Raimund hat so scheeni deitschi un ach rumänischi Lieder gsung, dass alli nit satt vum Horche gin sin, nix gsaat un nor wie wild geplätscht han. Manchi han derbei kreische misse, weil der Bu, der an sellem Tach de Star war, blinn is. Un wie die Gäscht aus Deitschland ne noher beglickwünscht un ne gfroot han, was er breiche kennt, hat de Raimund gsaat: „Ich brauch nor die Gsundheit. Doch die, die kann mer nit aus Deitschland bringe“!